

come loro l'hano tolto, cussi nostri lo torano per la Signoria nostra. Vol *etiam* saper si 'l dia inferir danno a li ditti rispetto a queste treugue; è pechato a perder si bel territorio come di quel di Raspo. El dito conte Christoforo menaza voler *etiam* Rozo e Colmo alegando esser iurisdiction di Raspo e per conseguente esser soi per esser Raspo suo. Lui voria far che i lassasse Bochari e di altri castelli l'ha. Scrive le zente è stà soto Raspo sono il forzo di Trieste e la Val de Mocho e de Postoyna, Castel Nuovo e de quelle bande; si duol da Cao d' Istria, over Muia, non habi auto aviso di tal preparation si feva.

Letera dil dito, di 28, ivi. Come i nimici hanno lassato dito castello ben prima ruinato in molti lochi, dubitando non li sia fato loro quello à fato a' nostri, vedendo non lo poter haver auto de plano e inteso esso provedador lo volea recuperar, e aver posto hordine con le zente di l' Histria che al trar de 3 colpi di artellaria tutti fusse li a Pinguento. Però lo ha lassato, e ha dito dicto locho vol el stagi cussi fino dura le triegue; e seguendo pace, vorà esser a raxon di dito castello e territorio. E stà trovà morti in dito castello di nostri, erano dentro, numero 8 e feriti 7 crudelmente, dei qual tre moriranno. 2 scampò et 5 menono prexoni, tra i qual el contestabele Francesco dil Tacho, ch'è stà menà a
 336* Trieste ferito su la testa; e lo lauda assai. Scrive lui provedador non è per moversi altramente se loro non fanno altro, over si la Signoria non li comanda; ma fa star tutte le zente in ordine che al segno dato tutti siano lì, per poter, achadendo, far quanto si rizercha.

337 *Exemplum.*

1512, in Londra.

Magnifice frater honorande.

Zà per longo tempo et molti anni scorsi che amovolvamente et con gran carità fraternalmente si abbiamo amato cordialmente insieme, per et molti veri efeti vi ò cognosuto sempre giusto, leal, afezionatissimo ai amizi vostri, per le innumerabel exsperienze fate in la persona vostra, de la qual sempre ne averò memoria; et in segno de zio, per el ritorno mio che sarà presto, a Dio piazendo, cognosereti li efeti miei saran benisimo conrespoxi a le parole. *Iterum*, per la suma devozion è in voi, vi priego ch'el ve piaqui, se saretì richiesto, adoperarvi in favorirmi con la giustizia da un expresxisimo torto che ne la persona

mia m'è *indebite* fato, ch'el comemorarlo, zerto per honor di chi el prozede, me dole; et el dolor ne le visere del cuor me penetra talmente, che non so come poterlo tolerar; el qual è questo:

L'anno del 1508 (1509), del mexe de zener, sentendosi i moti de Franza contra quello Illustrissimo Stado, zercandosi de' remedi per potersi riparar a le insidie fransexe et resister da quelle, per i sapientissimi consultori deputadi al governo nostro, si zercha de mandar secretamente in questo paexe un orator per dar causa a questo serenissimo Re moversi contra Franza, qual à titulo in quello regno, et come giustamente a lui l'aspetà, et exvegiarlo per far el dito Re franzoxo devertir de li inonesti moti contra el Stado nostro. Siando urgentissimo el bixogno et con suma zelerità mandarne uno, et senza tardità ne dimora per esser *ab omni parte* avenenate le strade da pasarsi, se non con manifestissimo pericolo de la vita, *adeo* ch'el si zercha uno per uno in Venetia chi li bastasse l'anemo da vegnir in tanta fortuna vedendosi da ogni parte el focho ardentissimo azexo; or *tandem*, da poi multi consulti, non trovando chi ci dese de naxo, io fui eleto a tal negotio senza mia saputa per lo excelso Consegio di X con la zonta, per parte prexa in quello e zerto per volontà de Dio e per ben di questo Excellentissimo Stado, con ducati 100 al mexe per spexe, de i quali no' avese a renderne conto a niuno. El zorno ultimo de zener, la Serenità del Principo, che Dio li dia longa vita, mandò per mi, ed io, non sapendo el perchè, andai. Sua Serenità me dize iò esser stà electo ambador qui, confortandomi a voler servir la tera, con suo' sapientissimi modi, tal ch'el me ligò che non sapi altro che dirli che *fiat voluntas tua*. Et si dico questa proxuntuosa parola, per Dio, missier Luca fradelo, non era posibele che altri cha mi avese potuto far questa opera; et per primo, el vegnir, a mi, posposto i preditti pericoli, m'erà facile per cadauna strada vegnir seguro, come, *gratia Dei*, vi veni, sapendo ben la lengua franzexa e todesca, poi questa lengua, per quanto se nativa fuse qui la lengua sciava e la greca; domandati a chi me cognose, el sapereti: ne rengratio l'Onipotente Idio de tanto dono. Or *tandem*, deliberai vegnir a servir quello Illustrissimo Stado, et *specialiter* esendo mandà per el Consegio de' X, che sempre ò intexo chi à meriti in quello si po' reputar felice: però me guardai avanti e non a drieto, come a zecato de l'ardentissimo amor de la patria. Tuto el mio inespuesto et inordinato lasai a drieto, e solo mi fu dà lira 25 de grosi che l'averia bastà s' io fusse andà a Mestre over a Trevixo, non ch'a vegnir per *ignem*